



«Nua hai jau gi mes chau?» sa dumonda quel che ha pers il chapè.

FOTOS C. CADRUVI




Tgi perda pomai talas custaivladads? Il bratschlet da Cartier era en ina valischa, emblidada a la piazza aviatica.

Tut emblidà! O ti cucu!

L'odissea d'in parisol cotschen ch'è i a perder en la viafier retica

■ (anr/vi) Jau sun in parisol cotschen. Mia ex-patruna m'ha emblidà en la viafier retica. Uss spetj jau a Wollishofen en il «Fundsachenverkauf» sin insatgi che ma cumpra. Jau cust otg francs. Capità èsi ina damaun da trid'aura avant dus mais: Mia patruna va uschiglio adina senza mai a lavurar. Ma quella damaun ploi. Ella ma prenda or da stgaffa e banduna l'abitaziun. I plova ed jau sun cuntent ch'jau dastg puspè ina giada esser en l'aria frestga. Ils daguts da plievgia ruschnan sur mia taila impermeabla e fan sguzias. Quai hai jau gugent.



Mia patruna arriva a la staziun da Trun ed inscuntra ina enconuscenta. Ellas prendan il tren e batarlan d'incuntin. A Cuira fai fina bell'aura, cura che mia patruna banduna cun sia amia il tren. Ella ma lascha simpelmain enavos.

Centrala per chats a Berna

Abandunà e tementà passent'jau in entir di en il tren. La saira ma chatta il nettegiunz e ma porta en in magasin, nua ch'i ha anc autras chaussas starschadas. Nus spetgaim enfin ch'ins spedescha nus a Berna en il post central che rimna ils objects ch'ins ha emblidà en ils trens svizzers. Las possessuras ed ils possessurs dals objects pon s'annunziar via internet tar quest post e s'infurmar, sch'ins ans ha chatta.

Sa sche mia patruna scriva era in e-mail e dumonda suenter mai? I varga in mais, ma ella na s'annunzia betg.

Jau sun trumpà. Sa sch'ella ha gia in auter parisol? In verd, in blau u forsa schizunt in mellen? Tge capita uss cun mai?

Las ultimas emnas hai jau passentà sper ina valischa da tgirom. Nus avain fatg in pau amicitia, pertge nus essan arrivads il medem di en il center a Berna. Uss vegnin nus dentant separads. Jau valè pli pauc che 50 francs e stoss perquai bandunar gia suenter in mais il post a Berna. La valischa vala dapli che 50 francs e po restar trais mais.

Ina paletta per di – e dapli

Ensemen cun giaccas da plievgia, fista da viandar, satgs da durmir e valischas vegn jau mantunà sin ina paletta. Tuppamain vegn jau gist stagnà sper ina tastga da sport che spizza. Ma jau hai era in zichel cletg ch'jau sun sisum. Sch'jau fiss giudim en la paletta – curclada da varga in meter material – giess jau forsa en paglia.

In camiun sportescha la paletta a Wollishofen sper Turitg en il «Fundsachenverkauf». «Èsi pussaival che la gliued emblida tantas chaussas?» smirvegla ina da las duas lavureras che s'occupan da la paletta. «Cler. Auters dis surveggin nus schizunt duas u trais palettas – tut plain cun rauba emblidada», di la segunda dunna. Ella para d'esser la schef-fa, pertge ella explitgescha co zavarar las chaussas.

L'emprim prendan las dunnas a maun la tastga da sport sper mai. Ellas svidan ora il culegn e bittan en il rument ils chalzers da ballape che spizzan. Las chauschas curtas e las soccas vegnan en in satg da resti. Il tricot original da Bayern-München mettan ellas d'ina vart per la vendita en l'internet. La tastga da sport vegn sin la pluna cun urden ch'ins vul vender en la stizun «Fundsachenverkauf». Era jau sun in dals objects che sa tschentan sin quella pluna.

In nov vestgi da nozzas

Paucas uras pli tard ma portan ins gia en la stizun. Ella è in toc pli gronda ch'il Volg a Trun. I ha vestgadira, velos e vitrinas plain bratschlets, uras, anels e telefonins. Jau vesess gugent dapli, ma ins ma deponescha visavi la cassa sper ils auters parisols. Jau na sun para betg il sulet parisol sin quest mund ch'è i a perder.

«Quant custas ti?» dumonda il parisol sper mai. «Jau cust otg francs», ditg jau, pertge ansant hai jau dudì co che las lavureras han discurrì da mes pretsch. «Lura na restas ti betg ditg en stizun», remartga mes vischin: «Ti has ina bella colur e vesas ora sco nov. Jau cust 14 francs e sun tut nair. Jau sun gia dapi in onn qua.»

Mes vaschin è in bagliaffunz. L'emprim sa lamenta el lung e lad ch'el n'haja gia daditg betg pli sentì plievgia sin sia taila. Lura cumenza el quintar, tge ch'el ha observà ils ultims mais. «Sco parisol han ins gea ina prima vista sin la cassa. Ti na craiss betg, tge chaussas ch'ins po cumprar en questa stizun. Novs vestgids da nozzas! Cornas da tschierv. Ed ina giada ha insatgi perfin cumprà in set da flautas d'in vakir! En las vitrinas vi là ha per cas bischutaria che vala varga 10 000 francs.»

Speranza ploi ditg

Jau m'allegri gia d'era pudair observar, tge che la clientella cumpra en il «Fundsachenverkauf». Qua èsi blier pli interessant ch'en la stgaffa stgira a Trun. Ma mes temp en questa stizun cuzza mo paucas minutas. Ina dunna ma tschappa gia: «Tge bel parisol cotschen! Mo per otg francs! Quel n'emblid'jau segir mai insannua!» La dunna marscha cun mai a la cassa e paja. Ora en il liber ploi. Ils daguts fan sguzias sin mia taila. Speranza ploi anc ditg – betg che mia nova patruna m'emblidia era anc insannua.



Films e portatuns per mintga gust.



Cosmetica ord tastgas emblidadas.



Instruments restan savens enavos en trens. «Fundsachenverkauf» po vender bain els.



Tschertas gravattas han ins forsa pers aposta.



Dapli egliers ch'in opticher venda la stizun a Wollishofen.



Per 17 000 francs venda «Fundsachenverkauf» il bratschlet cun la navetta da diamant e tschients brigliantins. Il juvelier schazegia la valur dal bratschlet nov sin 26 000 francs.



Telefonins, laptops, apparats da fotografar u blackberrys venda «Fundsachenverkauf» era via internet.